

A FEDERACIÓN DE ANPAS DA PROVINCIA DA CORUÑA CONVOCA UNHA MANIFESTACIÓN O 28 DE FEBREIRO PARA DENUNCIAR O ABANDONO ESTRUCTURAL DA ESCOLA PÚBLICA

Esta mobilización ten como obxectivo poñer de manifesto a necesidade dunha planificación real e recursos suficientes que garantan unha escola pública de calidade

A Coruña, 11 de febreiro de 2026. A Federación de Asociacións de Nais e Pais (ANPAs) e AFAs de centros educativos públicos da provincia da Coruña convoca unha manifestación o vindeiro **sábado 28 de febreiro**, ante a situación de deterioro e falta de recursos que afecta á escola pública.

A convocatoria conta co apoio das **ANPAs federadas**, arredor de **200 asociacións**, cifra que representa aproximadamente **o 50% das ANPAs da provincia**. Esta mobilización nace da análise e da recollida de datos achegados polos propios centros e polas comunidades educativas, que poñen de manifesto unha situación de **infrafinanciación, falta de recursos humanos e deficiencias en infraestruturas e atención á diversidade**, e a necesidade **dunha planificación real e recursos suficientes** que garantan unha escola pública de calidade.

Desde a Federación sinálase *“As ANPAs e AFAs dos centros educativos públicos mobilizámonos porque a situación da escola pública xa non admite máis parches nin demoras. O que durante anos foron incidencias illadas convertéronse nun problema estrutural que afecta de maneira directa ao dereito fundamental das nenas e dos nenos a recibir unha educación pública de calidade, inclusiva, segura e equitativa”*.

Segundo os datos manexados pola Federación, esta mobilización representa a comunidades educativas de arredor de **200 centros públicos** (CEIP, IES, EEI, CRA, CPI e CEE), e comprende ao redor de **62.000 e 65.000 alumnas e alumnos**, aproximadamente **o 50% do alumnado da rede pública na provincia**. Desde a Federación estase a contactar con outras asociacións e agrupacións para conseguir sumar a esta mobilización os máximos apoios e acadar unha maior representación da poboación escolar e familias.

CONVOCATORIA MANIFESTACIÓN FEDERACIÓN DE ANPAS DA PROVINCIA DA CORUÑA

Data: sábado, 28 de febreiro

Hora: 11:00

Inicio: Praza de Ourense

Remate: O Parrote

Percorrido: Praza de Ourense – O Parrote